

compagnar il Gran maestro a Rodi, su le qual meterà 5000 combatenti e con l'armata vol andar in Sicilia dove ha intelligentia. Per far divertir però, la Signoria fazi con la sua armata *etiam* lei per recuperare le sue terre. *Item*, vol fiorentini pagino la spesa. *Item*, voria si tolesse el ducha di Ferrara per capitano di la liga. Si faria boni effecti. Dice il nostro Governador non ha molta praticia di guerra « So lo tenete per amor mio, però questo Ducha valerà assai ».

Dil dito, di 6, da . . . Come vol far l'armata per divertir il signor Prospero, et è bon tuor per capitano el ducha di Ferrara.

Dil dito, di 8, da Auton. Come il Re manda monsignor di . . . in posta a la Signoria per alegrarsi col Doxe et per tratar di far armata etc.; e dise il Cardinal da Cales, non potendo concluder, vegnirà da Soa Maestà etc. *Item*, ha tolto 100 milia scudi da fiorentini.

152¹⁾ Fu posto, per li Savii dil Consejo e di Terra ferma, excepto sier Domenego Venier savio a Terra ferma, una letera al Governador zeneral nostro, come, havendoli scritto per altre l'unirsi con monsignor di Lutrech, al presente ne par darli *etiam* altro ordine, *videlicet* che volendo soa excelentia per beneficio di la impresa passar Po, col nome di Dio debbi passar con le zente; con altre parole etc. ma questa è la substantia:

Et a l'incontro, sier Domenego Venier savio a Terra ferma, messe de indusiar, havendosi a poner di far persona degna Provedador zeneral di campo, e poi si potrà meglio far tal deliberatione. Et volendo balotarse la letera et il scontro et mandata tre volte, vedendo niun andava a parlar, Mi parse di andar in renga, e feci una bella renga di la importantia si tratava hora di abandonar il nostro Stado e mandar le zente di là di Po, contra quello è stà preso Mercore passato, che lo non mi ho trovato, perchè vedendo niun parlar, Mi ha parso di parlar etc. E intrai su la materia, laudando la indusia et elezer prima un Provedador zeneral di primi, cegnando il Griti, nè si dovea aver rispo al beneficio di la terra, e meter la parte, et che fato quella deliberation, Lutrech passerà Po. Et essendo roto, il stato nostro e perso, ma indusiando *etiam* Lutrech anderà riservato. Zonzera il nostro Provedador in campo e si potrà meglio consultar. Con assa' parole qual non vojo qui scriver etc.

Et mi rispose sier Piero da cha' da Pexaro savio a Terra ferma, dicendo molte raxon, e passando Po

Lutrech harà vittoria, e perso Parma con le 400 lanze so' fradello monsignor di Lescu et 4000 fanti col signor Federico di Bozolo è dentro, senza dubio *actum est*, persuadendo dil prender di la letera e non indusiar, et che fanno ben il Proveditor in campo come ho dito mi.

Da poi sier Domenego Venier andò in renga, et li rispose ajutando l'opinion sua, et che il tempo fa far le deliberation, exortando la indusia, exclamando passando Po *de facili* saranno roti perchè Lutrech vorà sbarajar, perchè perdendo Milan el re Christianissimo non perde il suo regno e lo potrà recuperar, ma nui, perdendo le zente, chi varderà il nostro stado etc. persuadendo l'indusia come persuasi mi. 152*

E sier Francesco Contarini savio a Terra ferma, messe voler la letera, con questo de presenti si fazi il Provedador zeneral etc.

Io cridai non si pol meter. Questo scontro è di do nature. Io vojo il Provedador, ma non vojo l'altra. Et *etiam* sier Domenego Venier andò per parlar, *unde* el dito sier Francesco si tolse zoso et mandono solo la letera al Governador con il scontro dil Venier di la indusia. Ave una di non sincera, 4 di no, 62 dil Venier, 132 di Savii et questa fu presa.

Et era hore una di note. Il Doxe si levò e andò via et restò il Consejo per far il Provedador zeneral.

Fu posto poi, per sier Antonio Trun procurator, sier Francesco Foscarei, sier Zorzi Pixani dotori, cavalieri, savii dil Consejo e li Savii di Terra ferma, elezer di presenti uno Provedador zeneral in campo per scurtinio con pena ducati 500 et possi esser eletto di ogni loco et officio continuo; respondi *statim* hessendo qui, se non da matina a terza e parti el di seguente sotto pena *ut in parte*. Nota. Sier Domenego Trivixan el cavalier, procurator, sier Polo Capelo el cavalier, sier Andrea Griti procurator, savii dil Consejo, nulla volseno meter, et questa parte fo messa hogi justa il mio parlar, et è che sia electo con cavali 12 et do stafieri con ducati 200 al mese, possi tenir uno contestabile con 25 fanti, li fanti ducati 4 per uno et il contestabile sia una di le lanze spezade nostre.

Andò in renga sier Andrea Griti procurator, dicendo questa parte si meteva per mandarlo lui, scuandosi non pol più servir, ha servito fin l'à potuto, con altre parole, dicendo meterà uno scontro.

Et sier Andrea Griti procurator, savio dil Consejo di X, messe che sia electo uno Provedador zeneral in campo con ducati 120 al mexe per spese con cavalli 10 et do stafieri et possi esser electo di ogni loco e officio con pena etc. Et che sier Hironimo

(1) La carta 151* è bianca.